

Headlines

1. प्रधानमंत्री नरेंद्र मोदी होरें एलन मस्क हुंदे कन्नै टेकनालजी ते नमीं काडुं सरबन्धी क्षेत्रें च साथ-सहयोग करने बारै गल्लबात कीती ऐ।
2. मुख्मन्त्री उमर अब्दुल्ला होरें नौजवान पीढ़ी गी अपील कीती ऐ जे ओहू पढने दी आदत अपनान कीजे एहदे कन्नै ना छड़ा नौजवानें दे नजरिए च विस्तार होग, सगुआं उभरा करदे लखारिएं दा बी दिल बदोग।
3. जम्मू-कश्मीर च आतंकवाद कन्नै निब्बड़ने आहले सरिस्ते गी तगड़ा कीता जारदा ऐ। आखेआ डीजीपी प्रभात होरें।
4. राश्ट्रीय शिक्षा नीति 2020 गी दिखदे होई स्कूली शिक्षा विभाग ते के. जी जमात 1 च दाखिले आस्तै बरेसू सरबन्धी दिशा-निर्देश कीते जारी।
5. मौसम विभाग नै अज्जै कोला लेइयै 20 अप्रैल तोड़ी खरी बरखा, बर्फबारी दी पेशगाई कीती, सलाह जारी।

<><><><><><>

PM-Musk

प्रधानमंत्री नरेंद्र मोदी होरें अज्ज टेस्ला दे सी.ई.ओ एलन मस्क हुंदे कन्नै टेकनालजी ते नमीं काडुं दे क्षेत्र च साथ-सहयोग बारै गल्लबात कीती। इक्क सोशल मीडिया पोस्ट च श्री मोदी होरें आखेआ जे श्री मस्क हुंदे कन्नै बक्ख-बक्ख मुद्दे पर होई दी गल्लबात च इस बरे दी शुरूआत च वाशिंगटन डीसी च उन्दे कन्नै कीती गेदी चर्चा दे विषय बी शामिल हे। श्री मोदी होरें टेकनालजी ते नमीं काडुं दे क्षेत्र च अमरीका कन्नै सांझ भ्याली गी अगगे बदाने दे भारत दे धेइयै दी पुष्टि कीती।

<><><><><><>

CM-Book

मुख्यमंत्री उमर अब्दुल्ला होरें नौजवान पीढ़ी गी पढ़ने दी आदत पाने दी अपील कीती ऐ। उनें आखेआ जे एहदे कन्नै ना छड़ा उन्दे दृष्टिकोण गी विस्तार थ्होग, सगुआं एहदे कन्नै उभरा करदे लखारियें दा दिल बी बदोग। मुख्यमंत्री होर कल जम्मू च इक्क प्रोग्राम दौरान इक्क किताब दे विमोचन समारोह च बोला करदे हे। इस कताब दा सिरे लेख हा दा लैंड ऑफ सायल्स इक्क जोखिम आहली खोज दी कहानी। इस कताब दियां लखारी न 15एं बरें दी बरेसू दियां Laranya R. Kumar । मुख्यमंत्री होरें इस मौके पर Laranya होरेंगी बड़ी घट्ट बरेसू च एह उपलब्धि हासल करने पर ममारखां दित्तिया।। मुख्यमंत्री होरें आखेआ जे Laranya होरें ना छड़ा संभावनाएं गी कल्पना करने दी हिम्मत कीती, सगुआं उनें इसी इक्क समोहक कहानी च बदली दित्ता।

<><><><><><>

DGP-CI Operation

डी.जी.पी नलिन प्रभात होरें अज्ज आखेआ जे जम्मू-कश्मीर पुलस आतंकवाद दे खिलाफ शिकंजा कस्सा'रदी ऐ ते साइबर अपराधिणं कन्नै निब्वड़ने लेई बी कोशिशं जारी न। कश्मीर दे गांदरबल च इक पासिंग आउट परेड गी संबोधित करदे होई डीजीपी होरें आखेआ जे ओहू हर तरीके दा सहयोग ते मदद देने आस्तै केंद्र ते गृह मामले दे मंत्रालय दू शुक्रगुजार न। उनें आखेआ जे जम्मू-कश्मीर पुलस शहीदें दे परिवारें कन्नै खड़ोने आस्तै बचने बज्झी दी ऐ। पास आउट्स गी मुबारकबाद दिंदे होई डीजीपी होरें आखेआ जे ओहू हून दे बेहतरीन पुलसबल दा हिस्सा बनी गेन। उनें आखेआ जे इन्दे च अनुशासन ते किश करने दा जब्बा ऐ ते इनें सारेंगी भविक्ख आस्तै शुभकामनां।

<><><><><><>

Prakash-Purb

अज्ज नौमें सिख गुरु, गुरु तेग बहादुर साहब जी हुंदा प्रकाश पर्व ऐ। इन्दा जन्म 1621 गी अम्बरसर च होआ हा। ओहू 6में सिख गुरु, श्री गुरु हरगोबिंद सिंह जी हुंदे सब्बनें कोला लौहके पुत्तर हे। इक्क निडर योद्धा होने दे कन्नै गै ओहू अध्यात्मक विद्वान ते कवि बी हे। जम्मू-कश्मीर च इस मौके पर सिख समुदाय दे लोकें बक्ख-बक्ख थाहरें पर नगर कीर्तनें दा सरिस्ता कीता। बड़ी मती गिनतरी च श्रद्धालु गुरुद्वारें च मत्था टेकने ते गुरुबानी सुनने लेई जा करदे न। उंदा जीवन

ते शहादत धर्म दी हिफाजत करने दी इक मसाल ऐ। जम्मू-कश्मीर दे लेफ्टिनेंट गवर्नर मनोज सिन्हा होरें गुरूपर्व दे मौक़े पर लोकें गी शुभकामनां दित्तियां न। लेफ्टिनेंट गवर्नर होरें इक्क स्नेह च आखेआ जे हिंद की चादर श्री गुरू तेग बहादुर जी हुंदे प्रकाश पर्व दे पवित्र मौके पर शुभकामनां, आओ अस्स उंदी शिक्षा, करूणा, भाईचारा, निस्वार्थ सेवा, बरोबरी ते न्याऽ दे विचारें गी लेइयै अपने आपै गी परतियै समर्पित करचै।

<><><><><><>

Good-Friday

मुल्खै दे होरनें हिस्सें आहला लेखा अज्ज गुड फ्राइडे जम्मू च बी मनाया गेआ। दुनिया भरै दे इसाई समुदाय दे लोक अज्ज गुड फ्राइडे मना करदे न। एहू इसाई कलंडर च सब्बनें कोला पवित्र ध्याड़े चा इक्क ऐ। कैल्वरी च ईसा मसीह होरेंगी सूली पर चाढ़ने ते उंदी मौत दे चेत्ते च मनाया जाने आहला गुड फ्राइडे शोक, आत्मचिंतन ते आध्यात्मक भक्ति दा ध्याड़ा ऐ। मुल्ख भरै दे गिरजाघरें च खास प्रार्थनाएं दा सरिस्ता कीता गेआ। प्रधानमंत्री नरेंद्र मोदी होरें गुड फ्राइडे दे मौके पर शुभकामनां दित्तियां न। इक सोशल मीडिया पोस्ट च मोदी होरें ईसा मसीह हुंदे बलिदान गी चेत्ता कीता। उनें आखेआ जे एहू ध्याड़ा असेंगी दया, करूणा ते म्हेशा बड़े दिल आहला बनने दी प्रेरणा दिंदा ऐ।

<><><><><><>

Labour-Registration

सालाना अमरनाथ यात्रा च शामिल कार्यबल दी मदाद लेई श्रम मैहकमे आसेआ पुंछ जिले च पोनी आहलें ते घोड़े आहलें समेत होरनें मजूरें दा अपने चाल्ली दा पैहली रजिस्ट्रेशन अभियान चलाया गेआ। इस एतिहासिक गैं कन्नै इलाके दे तकरीबन 300 मजूरें गी फायदा होगा।

<><><><><><>

JEE-Main Result

2025 बरे दा सांझा प्रवेश स्टेहान जेईई मेन दे नतीजे कल्ल घोषित कीते जाडन। स्टेहानें सरबन्धी राश्ट्रीय एजेंसी नै इक्क बयान च आखेआ ऐ जे जे.ई.ई मेन 2025 दुए सत्र दा फाइनल आनसर दी अज्ज दपैहरी दो बजे कोला लेइयै जे.ई.ई मेन दी वेबसाइट पर उपलब्ध होई जाग।

<><><><><><>

Admission-Guidelines

स्कूली शिक्षा विभाग नै कल जम्मू च जमात 1 च दाखिले आस्तै घट्टोघट्ट तय उम्र च 30 सितंबर तोड़ी इक्कै बारी राहत दिती ऐ। विभाग नै साफ कीता ऐ जे शैक्षणिक सत्र 2026-27 कोला लेइयै नर्सरी, बालवाटिका, प्री-स्कूल ते आंगनवाड़ी च दाखिले दी घट्टोघट्ट तय उम्र 31 मार्च तोड़ी गिनी जाग। स्कूली शिक्षा विभाग दे अतिरिक्त मुख सचिव शांतमनु होरें सांझा कीता ऐ जे नर्सरी, बालवाटिका, प्री-स्कूल ते आंगनवाड़ी च दाखिले दे सरबंध च घट्टोघट्ट उम्र पर सफाई मंगदे होई कई प्रतिनिधिमंडलें विभाग कन्नै संपर्क कीता, खास करिए राष्ट्रीय शिक्षा नीति 2020 दे संदर्भ च। उनें जोड़ेआ जे इस मुद्दे गी (NEP) 2020 कन्नै जोड़ियै जांचेया गेआ जेदे मताबक नर्सरी, बाल वाटिका, प्री-स्कूल ते आंगनवाड़ी च दाखिला लैने आहले बच्चें दी उम्र 3 साल होनी चाइदी। उआं शांतमनु होरें एहू बी आखेआ जे शिक्षा नीति गी लागू करने बारै चला रदे बदलाव दे दौर दे मद्देनजर पिछले 2 शैक्षणिक सत्रें च किश राहत दिती गई ऐ। उनें आखेआ जे एहू राहत जम्मू दे सारे शिक्षा संस्थानें विंटर जोन दे स्कूलें गी छडियै लागू ऐ।

<><><><><><>

IMD

मौसम विभाग नै जम्मू संभाग दी पीर पंजाब रेंज च कश्मीर संभाग दी उच्ची थाहरें पर अज्जै कोला लेइयै 20 अप्रैल तोड़ी खरी मती बरखा, बर्फबारी ते अंधी झक्खड़ दी चेतावनी दिती ऐ। आकाशवाणी जम्मू संवाददाता नै दस्सेआ ऐ जे मौसम विभाग नै जानकारी दिती ऐ जे खराब मोसम दे चलदे जम्मू-श्रीनगर ते श्रीनगर-लेह जरनैली शिड़क ते होर दुई बड्डी शिड़कें पर गड्डिएं दी आओजाई पर असर पौग। जम्मू-कश्मीर दे डिवकाम गी मौसम विभाग बक्ख्य सलाह जारी कीती गई ऐ जे सक्रिय पच्छमी खोहल दा असर जम्मू-कश्मीर ते कन्नै लगदे इलाकें च अज्जै कोला दिक्खने गी लब्बोग। सलाह च आखेआ गेआ ऐ जे ऐसे हालातें दे चलदे हल्की थमां मती बरखा या बर्फबारी जम्मू-कश्मीर च अज्जै कोला लेइयै 20 अप्रैल शामी तोड़ी होई सकदी ऐ।

<><><><><><>

World Heritage Day

विश्व धरोहर ध्याड़ा अज्ज डागरा आर्ट म्यूजियम जम्मू च मनाया गेआ। खरी मती तादाद च स्कूली बच्चें ते आम लोक संग्रहालय दा रूख कीता ते जम्मू दी सांस्कृतिक धरोहर दे सांभी दिएं पुरानी चीजें च दिलचस्पी दस्सी। इस खास ध्याड़े गी मनांदे होई सरकार नै जम्मू-कश्मीर च सारें संग्रहालय च अज्जै दे दिन मुफ्त प्रवेश दी सुविधा दिती। इस कदम दा मकसद अपनी धरोहरें दी सांभ गी लेइयै सारेंगी जागरूक करना ते नमीं पीढ़ी गी अपनी संस्कृति कन्नै जुड़ने, उसी सम्मान देने ते ओदी रक्षा आस्तै प्रोत्साहित करना हा।

<><><><><><>

Reasi-Apple

क्षेत्र च बागवानी गी बदलने ते इक महत्वपूर्ण विकास आस्तै कृषि विज्ञान केंद्र रियासी नै सेब दे बूटें दी इक खास किस्म तैयार कीती ऐ जेदे पर गर्म ते उपोष्ठा कटीबंधीय मौसम च बी फल लगगडन। एह्दे कन्नै इलाके दे करसानें आस्तै मेद दी किरण जागी ऐ जेड़े गै पहले तापमान दे फर्क करी सेब नेही उगाई सकदे। रिवायती तौरा पर सेब उच्चे, ठंडे प्हाड़ी इलाकें च उगाए जंदे न जिनेंगी गर्म मौसम च उगाने गी सेही नेई समझेआ जंदा, मगर के.वी.के रियासी ते शेर-ए-कश्मीर यूनिवर्सिटी ऑफ एग्रीकल्चर साइंस एंड टेक्नालजी दे नमें शोध कन्नै ताप गी बर्दाश्त करने आहली सेब दे बूटें दी किस्म तैयार कीती गई ऐ। वरिष्ठ साईंसदान ते केवीके रियासी दे प्रमुख डॉ. बनारसी लाल होरें दस्सेआ जे सेब दे बूटें दी नमीं किस्म गेम चेंजर साबत होग। 30 डिग्री सेल्यिस तापमान पर बी इस बूटे पर फल पौंगन।

<><><><><><>

Haji Poonch

पवित्र हज यात्रा पर जाने आहले श्रद्धालुएं दी सेहत ते सुरक्षा गी यकीनी बनाने लेई पुंछ जिले च सेहत मैहकमे आसेआ 4 सेंटरें पर टीकाकरण अभियान चलाया गेआ। हज यात्रा पर जाने आहले 73एं जनें एह् टीका लोआया।

<><><><><><>